

Incumbensa Ulber concernent la frequentaziun da la scola tar auters purtaders da scola

Tenor la Lescha da scola frequenta mintga uffant en il chantun Grischun la scola da quella vischnanca, en la quala el ha – cun il consentiment da las persunas responsablas per l'educaziun – dimora permanenta. Sin dumonda da las persunas responsablas per l'educaziun po in uffant vegnir ammess – en cas motivads – a la scola d'in auter purtader da scola. Sche quai èn interess persunals che mainan a la midada da la scola, ston las persunas responsablas per l'educaziun pajar ils daners da scola ed ils eventuels custs da transport. Sch'i n'èn betg decisivs interess persunals da l'uffant, paja il purtader da scola cedent ils daners da scola ed ils custs da transport.

Scolaras e scolars che han in basegn da promoziun spezial han il dretg sin mesiras da la pedagogia speziala. Questas mesiras da la pedagogia speziala pon esser mesiras simplas u mesiras pretensiusas. Ils purtaders da scola garanteschan che la purschida da la pedagogia speziala saja avant maun e vegnia realisada en il sector simpel.

Las mesiras pretensiusas pon tranter auter esser l'instrucziun en scolas spezialas, la tgira che tutga tiers u schizunt ina tgira staziunara. L'uffizi ordinescha las mesiras pretensiusas ed il chantun finanziescha quellas er. La Regenza po concluder ch'il purtader da scola sa participeschia als custs da mintga scolara pertutgada e da mintga scolar pertutgà. La participaziun als custs na dastga betg surpassar 15 pertschient da la media dals custs annuals chantunals per scolara e per scolar. La pratica vertenta èn 21 francs per di, quai che corresponda a 7665 francs per onn. La realisaziun po succeder en moda integrativa en la classa regulara, sche quai è d'avantatg per la scolara u il scolar e sche quai è supportabel per la classa regulara. Per exempel po in uffant che ha in impediment da l'udida e da la vesida frequentar la scola regulara e vegn accompagnà cun terapias e cun furmas da promoziun integrativas.

En cas singuls duai l'instrucziun d'uffants integrada en il sector pretensius pudair vegnir realisada en in auter purtader da scola, sche quai è in avantatg per l'uffant. Ils daners da scola che resultan en in tal cas, ston vegnir pajads dal purtader da scola cedent. Per exempel pudess in uffant che discurra rumantsch e che ha in impediment da l'udida vegnir instruì en ina scola regulara tudestga, per che las premissas per emprender la lingua da segns ch'i na dat betg per il rumantsch, sajan dadas.

Las sutsegnadras ed ils sutsegnaders incumbenseschan la Regenza da stgaffir las basas legalas per che l'Uffizi per la scola populara ed il sport possa surpigliar ils daners da scola, sch'ina instrucziun en in auter purtader da scola pussibilitescha las mesiras da la pedagogia speziala en il sector pretensius e sch'i n'èn avant maun naginas alternativas equivalentas.

Tavau, ils 16 da zercladur 2021

Ulber, Kasper, Schwärzel, Baselgia-Brunner, Bettinaglio, Brandenburger, Brunold, Buchli-Mannhart, Cantieni, Casutt-Derungs, Clalüna, Crameri, Danuser, Degiacomi, Derungs, Epp, Favre Accola, Felix, Florin-Caluori, Föhn, Gartmann-Albin, Geisseler, Gugelmann, Hardegger, Hartmann-Conrad, Hitz-Rusch, Holzinger-Loretz, Horrer, Kohler, Kunfermann, Lamprecht, Loepfe, Maissen, Märchy-Caduff, Michael (Donat), Müller (Susch), Natter, Niggli-Mathis (Grüsch), Papa, Paterlini, Rettich, Ruckstuhl, Rüegg, Rutishauser, Sax, Schmid, Thomann-Frank, Tomaschett-Berther (Trun), Widmer (Favugn), Widmer-Spreiter (Cuir), Zanetti (Landquart), Bürgi-Büchel, Spadarotto, Stieger